

الفصل الثالث عشر

جزء جدير بالضحك من قلبكم.. والابتسام والاستلقاء على
ظهوركم..

ولأنني عارف أن الدنيا الآن كئيبة وعجيبة.. وحزينة ومطفية..
ومحبطة وغريبة.. وبحمد الله جعلني الله فيكم وليكم.. نوراً
بالفرحة في قلوبكم.. وبسمة على بكم ووجوهكم.. ولو ما
ضحكتوش من أعماقكم.. يبقى العيب فيكم أو شفايفكم..؟ أما
السرد.. يا عيني عليه..! وأنصحكم أن تغيروا الماكينة والعفشة..
وده مش هزار أو قفشة.. لكن حقيقة.. تروسكم وحشة..!

بيننا على الضحك والفرشة.. والقصص المفرفشة..! واللي
معاه كارنيه العضوية يقعد.. واللي معاهوشي يمشي..!

كنا أنا وسامي دراز والشاويش هاني عمر حسنين.. وكذلك
عادل عامر وشريف رشدي ورمزي تلعب وسامي الشرقاوي رحمه
الله.. قاعدين في العنبر في مساء أحد أيام الخميس.. أنا ودراز
قاعدين اختياري (كاتبين على تعيينات) أكل خميس وجمعة..
والشاويش هاني باحترامه نوبتجي.. والباقي إجباري حبس
أسبوع..! دراز اتسحب في الخباثة وأكل ولبس لبس الفسحة الميري
واتسرب على بره.. فقسته على الباب: رايح فين.. قالي: بلاش
عتاب.. عشان أكل.. وللعنبر ساب.. ومكنش فيه ونس وطلاب..

قالي: استر عليا .. وحاجيلك هدية..؟ أخذت منه الكارنيه..
رهنية..! .. الساعة ٨ كنا على موعد بالراديو الترانزستور مع
حفلة الست ثومة بقصر النيل..! سمعنا كل وصلاتها ونمنا
أجمعين.. الساعة ١ بعد منتصف الليل.. فوجئت.. بشبح طويل..
بيزق فيا .. اصحى . اصحى .. سويلم .. سويلم .. أعود بالله من
الشیطان الرجيم .. باسم الله .. انصرف .. انصرف .. العفريت
متح ولازق .. وبيشد البطانية .. خفت عليها واتمسكت بيها عشان
عهده .. وصرخت ولميت عليه كل الموجودين المذكورين .. وضربت
زمارة الإنذار .. اتولع النور أتوماتيك .. (تكنولوجيا زمان)

وكمان السراير الفاضية من الطلاب قامت بمراتبها
وبطاطينها وحاصرت المشتبه فيه..! طلع مين .. سامي دراز ..
فيه إيه ياسمسم؟ .. كانت عايزاك يا سويلم .. مين هي؟ .. الست ..
يا لهوي أنهو ست ..! أم كلثوم .. هي سألت عني ..؟ .. بس كانت
عايزاك تسمعها .. ما أنا سمعتها .. لا .. أقصد تشوفها .. لا يا عم أنا
لسه صغير .. أنا بكلمك جد ..! .. ليه .. عشان أنا روحت السينما
(قصر النيل) وشففت الحفلة وأبويا (اللواء عزت دراز مدير ميناء
إسكندرية آنذاك) جابلي تذكرتين جدعنة .. طب يا جبان مش
أنا صاحبك وجارك .. إيه الندالة دي وكل حاجة بنتشارك فيها ..
اشمعني دي ..؟ معلش يا سعده أصل أنا كنت مزنونق في حنتين
هدوم أترسم بيهم بعث تذكرة وجبت كسوة العيد .. طيب .. نسيت

أقولك يا سويلم محافظ القاهرة كان موجود وقعد جنبى في أول صف.. بتحسنى.. ولا إيه..؟ لا والله..! أنا بأقولك بس عشان تعرف مقامى وكويس إنى أنا في وسطكم.. وبالكلمكم..! طيب شكرا يا أمير يا متواضع..! .. في الصباح الباكر حاصرت العنبر من بابيه وصادرت جميع الجرايد التي يأتي بها بعض طلاب الأقاليم والعائدين ولم يسافروا وكانوا يقيمون عند أصدقائهم أو بعض من أقاربهم وقرأت في الصفحة الأخيرة في الأهرام الوصف التفصيلي للحفلة من لون الفستان دبلان (أخضر دنتيلا).. التي كانت ترتديه الست.. صحينا.. وبدأ الحوار منى لسامى: مبروك على الحفلة.. كانت رائعة وجو وعالم تانى لما تشوفها بعينك غير التليفزيون أو الراديو.. غير إحساسك إنها بتغنى لك مخصوص.. وإنك من علية القوم ومن الناس الهاي..! مش زيكم حوش وباي..! هي كانت لابسة إيه يا سامى.. أسود سادة.. يعني ما ينفعش أخضر..؟ .. راح موطى راسه ومطرطر ودانه وقال: مين اللي قالك..؟ روجت ملبسه الجرنال في وشه.. قراه.. وقالى: أصلى أنا كنت قاعد ورا ومش شايف وسعات كنت بستلف من اللي جنبى النظارة المكبرة عشان أشوف..! أنت والمحافظ كنتوا قاعدين ورا..؟ وبتخمسوا في النظارة المكبرة..! عضمة على عضمة يا سامى.. أصل أنت حقودى وبتغير منى وعمرك ما روجت مسرح ولا حتى سينما.. وأنا الحق عليا اللي باثقفكم يا جهله..؟

الموقف الثاني من سامي هو ده الأنقح.. حدث هرج منا في إحدى المحاضرات بالكلية يوم الخميس.. وراح الدكتور المحاضر شاكيا للرئيس(اللواء حسين ابراهيم).. فأمر بطابور زيادة تكدير خيالة.. كجزء للردالة قبل خروجنا للفسحة.. كنا في الخانة والصول هو النوبتجي لأن الضباط روحوا وكل واحد فينا بيجر حماره أقصد حصانه استعدادا لركوبه وعشان بييجي ويتحرك معاك لازم تدور وشك عنه.. ولو بصلته وش.. لوش يتتح وما يتحركش ولو بالطبل البلدي.. المهم الحصان زرجن مع سامي دراز.. فقال للصول: أنا ابن اللواء عزت دراز.. (الصول مش عارف اسم مدير الكلية بيقى حايعرف والد سامي).. عايز إيه يا فندي..! عايز حصان حنين.. بلاش دلع يا فندي اركب.. أول مرة ما فيش كوسه..؟ وركب وهو خايف ومضطر ومضطرب.. ولسوء حظه.. كانت كل الأحصنة بتاعة الخانة واللي على جانبنا ذكور وحصان سامي فقط أنثى..! أنا وسامي الشرقاوي عملنا خير..! وساعدنا دراز في حمله وتركيبه على الحصان الأنثى العتية الشقية وضربنها بالقمشة.. فوجئنا الحصان هو اللي سابق دراز.. وجميع الأحصنة بتاعت خانتنا.. بتجري وراء سامي دراز وحصانته.. وسامي فاقد للقيادة أو السيطرة وطارت بسامي خارج الخانه.. وراحت تعاكس حصنات الخانة اللي جنبنا.. وتشمهم برفاناتها وتجري على الخانة الأخرى اللي جنبنا

وسامي طائر ويصرخ ويستغيث.. وأصبح المنظر كالآتي جميع
أحصنة الخانات بتجري وراء سامي دراز وحصانته وهو متشعلق
فيها ومتكعبل وهي بتجري وبترفس وتسهل.. وتصادف أن سيارة
التلفزيون كانت قد جاءت للبدء في تصوير فيلم عن حياه الطلاب
بالكلية تحت اسم (يوم في حياه طالب الكلية)..! وكانوا بيعملوا
تجارب على التصوير بالكاميرات.. وبالصدفة كان لذلك المشهد
المفاجئ..! قفزه حصانة سامي طائرته فوق سور من الاشجار..
وفرت سريعا وأصبح سامي في الهواء وفلت اللجام.. ونزل سامي
بجوار سياج الأشجار في مجري مائي بالجوار.. واتفشش وامتلاً
بالماء والطين والغبار.. وأصبح عنوان الفيلم التسجيلي (طالب في
اسطبل الكبار.. بين الشهداء والأبرار) ووضع في الجبس الكلي..
وكنا نزوره يومياً باللجام..!

